

Ademas a celebra hunto cu piscadornan di Aruba nan dia

Minister Otmar Oduber a duna inicio na e proyecto di renovacion di pier di Hadicurari


ORANJESTAD (AAN): Diadomingo Minister Otmar Oduber tabata presente na Centro di Pesca Hadicurari pa celebra hunto cu piscadornan di Aruba Dia di Piscador, ademas a duna inicio na e proyecto di renovacion di pier di Hadicurari.

E dia aki tabata reina un tremendo ambiente unda cu no solamente piscadornan di Aruba tabata presente,

sino tambe un cantidad grandi di personanan cu a bin celebra Dia di Piscador na e tremendo actividad organiza pa Centro di Pesca Hadicurari y Santa Rosa.

E biaha aki Mercado di Santa Rosa a bay Hadicurari pa asina comparti hunto cu e piscadornan e dia special aki.

Minister Oduber a cuminda y conversa cu varios piscador unda el a felicitanan



riba nan dia y a muestra su aprecio pa e ofishi cu nan ta realiza, manteniendo e tradicion aki bibo den nos cultura. Ta importante pa menciona cu por a mira un cantidad grandi di hoben cu ta dedicando na e ofishi di piscador, un herencia cu ta siguiendo di generacion en generacion, mustrandone asina cu nos sector primario (pasobra esaki ta tuma lugar tambe den agricultura y cria) ta rebibando den nos comunidad.

E dia aki tabatin otro ingre-

diente special, particularmente pa e piscadornan di Noord. Minister Oduber a duna inicio na e proyecto di renovacion di e pier di Hadicurari, cual despues di diferente pier rond di nos isla cu a worde renova y amplia, a yega na beurt.

E mandatario a expresa cu e ta hopi contento di por duna inicio na e renovacion di otro pier, cual ta contribui na e mehoracion di e condicionnan pa cu e piscadornan, den e caso aki, e piscadornan di Noord.

